

Talentonan musical na concierto Donny Laclé



ORANJESTAD - Recientemente Fundacion pa Talento Musical Donny Laclé a presenta un biaha mas su Concierto Dominical. Esaki a tuma luga den Café Musical na Biblioteca Nacional na Playa.

Nos talentonan musical a presenta un programa varia di un calidad hopi halto, segun comunicado cu nan a manda. Trio Zelos, e prome grupo cu a presenta, ta consisti di Ignar Maduro, piano, Christopher Thiel, cuarta y Mario Kelly Jr., fyo. Tres hoben adulto hopi dedica na musica cu

ta domina diferente instrumento musical. Cantando y tocando entre otro: Canucu di Seit, Mi tin algo di bisa bo, Un dia anochi, nan a duna presentacion bunita cu basta ambiente.

Mientras e siguiente grupo tabata prepara, e Caha di glas a pasa rond den cua tur presente por a haci nan donacion cu na fin di aña lo beneficia diferente hoben talento musical cu un yudansa financiero pa cu nan estudio di musica.

Despues a sigui Camilo

Muyale y su 32 Tropical. Camilo Muyale despues di hopi aña a presenta atrobe cu su harpa y 3 musico mas: Papito Rafael, Fay Luydens, Doedel Sofia y Jossy Brokke Jr., como cantante invita y alabes tocado di maraca.

Nan a brinda e publico un variacion di cantica instrumental, entre otro All my love, Nos a sali paranda, Lagrimas Negras y a termina cu dos bunita cantica den bos di Jossy Brokke: Mi dushi Papiamento y Mensahe di Chuchubí. E publico a keda encanta cu nan presentacion y ya e ora ey e pianan a cuminsa kishiki.

E actuacion di Nuevo Sabor Musical bao direccion di Ricardo (Cay) Luydens y hunto cu e demas integrantenan: Eric Rafael, Papito Rafael, Pedro Velasquez, Roy Croes y Raul Vrolijk a pone e cherry riba e bolo. Nan a toca entre otro: un wals y un son montuno di propio inspiracion, e balada Usted es la culpable y algun mas y e pista di baile a yena y pone hopi ambiente, e comunicado ta clausura.

